

# Cun nouva dirigenta a la festa da chant

Radunanza da delegats da l'Uniun da chant districtuala

■ (anr/fa) Davo 15 ons ha demischiunà Curdin Linsel sco dirigent districtual da l'Uniun da chant da l'Engiadina, Val Müstair, Bergiaglia e'l Puschlav. Sia successura es d'vanteda Ladina Simonelli. «Daspö la festa da chant districtuala 2011 a Zernez culla partecipaziun da 24 cors e'ls cors d'uffants da Scuol, Zernez, Zuoz e Puntraschigna s'ha müdadada la situaziun a regard il numer da cors be minimalmaing», ha orientà il president Armon Parolini in venderdi saira a las trenta delegadas e delegats da l'Uniun da chant districtuala Engiadina, Bregaglia, Valle di Poschiavo e Val Müstair chi d'eiran preschaintas a Zernez, «ils cors masdats da Strada/Martina e da Ramosch fuorman uossa il cor masdà Valsot, il cor masdà Bregaglia, il cor da baselgia ed il cor masdà Val Müstair as vaivan scholts, ma i sun intant sün buna via da gnir reanimats», ha' dit. In chosa cors d'uffants ha' infuormà plünavant chi exista amo adüna la difficultà da motivar ad uffants da tour part e restar ün pèr ons i' cor. «Bliers sortan per motivs da differents sports o causa chi frequaintan classas plü otas e manajan chi nun hajan plü temp pel chant sper la scoula.» Eir il dirigent districtual Curdin Linsel ha dat üna survista, e quai üna persunala.

## «Promovü il chant in differentas manieras»

Da l'on 2000 d'eira gnü elet Linsel sco successur d'Albert Gaudenz da Zuoz. Insemel culla suprastanza ha el defini üna



La suprastanza da l'Uniun da chant districtuala cul president Armon Parolini (schn.), Curdin Linsel, Andri Schöpf, Ladina Simonelli e Gervas Rodigari.

FOTO F. ANDRY

strategia, ün concept a lunga vista: «Ils böts d'eiran da promover il chant per uffants, per chantaduras e chantaduors plü fervents, chant per minchün e cuors da diriger.» El ha manzunà las eivnas da chant per uffants da tuot il district, sco eir quellas pels creschüts nomnadas En-

sembles a Lavin. «Dürant 12 stads s'han eir inscuntrats commembers e commembras da nos district per chantar suot la direcziun dad Iso Albin e plü tard da Peter Appenzeller.» Cha tuot quai saja stat pussibel be grazcha al sustegn da bleras persunas, ha' accentuà, tanter oter la suprastanza actuala cun Armon Parolini, Ladina Simonelli, Andri Schöpf e Gervas Rodigari. Sco nouva dirigenta districtuala ha elet la radunanza a Ladina Simonelli. Il president Parolini e'ls commembers da la suprastanza sun gnüts reeletts pels prossemis trais ons. Sco nouva assessura es

gnüda eletta Barbara Camichel-Zraggen.

## 22 cors fingià annunzchats pella festa a Poschiavo

Claudia Fontana dal Coro Misto Poschiavino, vicepresidente e secretaria dal comite d'organisaziun, ha orientà davart la prosma festa da chant dal district. Quella ha lö als 4 e 5 gün 2016 i' Puschlav. «Davo cha Poschiavo nun ha daspö 50 ons plü organisà ingüna festa da chant s'allegra il coro da pudair artschaiver prossem on ad almain 22 cors», ha ella dit, «scha tuots vegnan sun quai var 650 chantaduras e chantaduors da tuot il district.» Sco giasts saran da la partida il Coro Adiemus da Bergamo e'l Bündner Jugendchor. Che chi chaschuna als organisatuors amo ün pa rumpatesta es tenor Claudia Fontana il viadi da tuot ils cors fin a Poschiavo: «I nun es amo gratià da chattar culs respunsabels dal trafic public üna soluziun chi pussibilitess als cors da gnir cul tren o culla posta fin i' Puschlav.» La prosma festa da chant districtuala, da l'on 2018, organischescha il cor viril da Samedan. «Siond cha'l dirigent Omar Iacomella es oriund da Chiavenna es nada l'idea d'organisar quel on üna festa 'extra muros', per uschè dir, nempe a Chiavenna», ha infuormà il president Armon Parolini. La festa da chant gniss organisada insemel cul Coro Eco del Mera, il proget as nomna Rezia Cantat 2018. «Quista proposta sto però amo gnir trattada e sancziunada dals delegats da l'Uniun da chant chantunala.»

# «Bliers d'eiran stuts da la gronda raccolta»

Prüma stagiun per l'üert biologic a Crusch

DA FLURIN ANDRY / ANR

■ Daspö quista stà exista a Crusch ün toc sur l'ustaria la «Cruschada, ün üert per minchün». La giardiniera Cilgia Rauch fa bilantsch da la prüma stagiun da quista sporta. La «Cruschada» es ün üert biologic chi dà la pussibilità a minchün e minchüna da crear ün üert tenor agen giavüsch. Sün 1200 meters sur mar crescha a Crusch da tuotta sorts plantas, verdüra, frütta, pomma, fluors ed erbinas. Tuot quels chi vessan plaschair d'ün agen üert, chi nun han però il temp, la pazienza o il terrain per quel, pon tour a fit a Crusch ün toc da l'üert. Ils cliaints han trais pussibilitats: Els pon gnir a Crusch e semnar svesa

quai chi vöglian. O ch'els laschan far quella lavur a la giardiniera e vegnan a racogliar. Sco terza pon ils cliaints da plü dalöntschi davent eir crear lur üert via internet. La sporta cun l'üert chi ha üna grondezza da var 50 sün 12 meters vain manada da Cilgia Rauch cul sustegn da sias sours Anna e Tinetta. «Ellas fan la lavur administrativa e digitala, intant ch'eu cultiv l'üert», disch la giardiniera Cilgia Rauch.

## Cumanzà cun 13 parts da l'üert fittadas

«Ils prüms traidesch cliaints cha no vaivan d'eiran surtuot amias e cuntshaints da mias sours, divers eir giò la Bassa», manzuna ella. Cur chi sun cumparüts

artichels davart quista sporta a Crusch in differentas gazetatas, «impustüt in quella dals 20 minuts», s'ha augmentada la quantitè da cliaints da la Cruschada: Actualmaing hana üna trentina da cliaints. Las vistas sun tenor Cilgia Rauch bunas cha quai saja il cas eir prossem on. «Schi's pensa a las chaluors da quista stà chi faivan cha'ls prodots gnivan plü svelts pass, schi es quai sgüra ün success», s'allegra ella. Chi saja stat da rier ch'üna part da la glied d'eira stutta a verer quant cha plantas d'üert prodüan, manzuna la giardiniera, «chi creschan p.ex. pro'l broccoli adüna darcheu nouvs cheuins o chi creschan adüna darcheu nouvas piessas.» Cliaints indigens ha la Cruschada per intant amo be duos:

«Quai nu fa star uschè stut, ils bliers dals indigens han svesa üerts, e lura nu d'eira nossa sporta forsa neir na amo uschè cuntshainta.»

## «Plüssas robas as poja amo optimar»

Istess han las sours Rauch eir divers cliaints indigens: «Sülla s-chamgia sper il stradun vers Ramosch, pac toc davent da nossa chasa, vaina installà üna chaisetta cun aint prodots da nos üert», disch la giardiniera, «chi chi vaiva interess fermaiva e pigliaiva oura ün cop salata, ün cardifol o alch oter, e mettaiva aint ils raps illa chascha.» Ch'ellas hajan fat bunas experiencias cun quista sporta, constata ella, «ingün nun ha ingolà, i d'eira adüna aint l'import per quai chi

vaivan tut.» Quista sporta prevezzan Cilgia Rauch e sias sour Anna e Tinetta dad optimar prossem on amo. I prevezzan da metter suot tet la chaista pels prodots da lur üert. «Lura nun esa mincha jada da cuorrer cur chi plouva a cuernar la verdüra.» Ün'otra roba ch'ellas vöglian müdar pel 2016 es da limitar ün pa la schelta da quai chi cultivan in lur üert. «Quist on vaina proponü bod ün pa blier, da ravanels fin a giabusöl.» D'incurot ha Cilgia Rauch fat üna saiv intuorn l'üert da la Cruschada: «I m'han dit da verer pro chi gnian ils tshiervis, e baincomal, pro meis vaschin suna fingià stats in üert.

Ulteriuras infuormaziuns: [www.cruschada.ch](http://www.cruschada.ch)



La giardiniera Cilgia Rauch ha gnü plaschair da tuot quai chi'd es creschü i' l'üert a Crusch.

FOTOS F. ANDRY



Ils giabusöls prodüan amo adüna bels cheuins.